

**Jangan Pilih Pemimpin Berpandukan Emosi - Dr Mahathir  
Bernama  
15 September , 2011**

KUANTAN, 15 Sept (Bernama) -- Sekiranya rakyat memilih pemimpin berpandukan emosi tanpa membuat penilaian terlebih dahulu, mereka berkecenderungan akan mendapat seorang pemimpin yang tidak akan mampu memimpin mereka.

Bekas Perdana Menteri Tun Dr Mahathir Mohamad berkata walaupun kuasa memilih pemimpin terletak di tangan rakyat, namun penilaian dan keputusan yang bijak perlu dibuat oleh rakyat untuk menentukan pemimpin yang tidak akan mengecewakan mereka.

"Sekiranya rakyat tidak bijak dan membiarkan dipengaruhi emosi, rakyat berkemungkinan memilih pemimpin yang tidak mampu memimpin dan akan membuatkan rakyat derita.

"Kalau kita tidak dapat kerajaan yang baik, salahkan diri kita sendiri, jangan salahkan demokrasi...salah kita sebab buat pilihan yang tidak baik," katanya ketika menyampaikan syarahan umum bertajuk "Cabaran Kepimpinan Masa Hadapan" di Universiti Malaysia Pahang (UMP) di sini Khamis.

Beliau berkata rakyat pada hari ini masih terpengaruh dengan sentimen dan kesetiaan mereka kepada pemimpin pilihan mereka.

"Ini akan menyebabkan mereka membuat pilihan yang salah terutamanya ketika memilih calon pada pilihan raya umum, harap rakyat faham bahawa pilihan raya umum bukan untuk memberi tempat untuk calon kegemaran kita tetapi sebaliknya pilihlah pemimpin yang benar-benar berwibawa, cekap dan dapat sokongan ramai," katanya.

Dr Mahathir berkata seorang calon pemimpin juga perlu memikirkan terlebih dahulu sama ada mereka benar-benar layak untuk memimpin rakyat dengan mengetepikan kepentingan diri sendiri sebaliknya mendahulukan kepentingan rakyat.

Perkara utama yang perlu dimiliki oleh calon pemimpin adalah ilmu pengetahuan yang mencukupi iaitu mempunyai pengetahuan mendalam dalam pelbagai bidang selain bijak menangani segala permasalahan yang bakal timbul baik dalam masyarakat mahupun persekitaran, katanya.

Pada sidang akhbar kemudiannya, Dr Mahathir berharap Bajet 2012 yang akan dibentangkan kerajaan pada 7 Okt depan adalah satu bajet yang adil kepada setiap kaum.

"Kita nak bajet yang adil dan tidak membelakangkan mana-mana kaum sebaliknya mengambil kira kedudukan kaum iaitu beri keutamaan kepada siapa yang sudah maju dan siapa yang harus ditolong," katanya.

--BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=613828>